

**NEAUTORIZIRANI TRANSKRIPT**  
**JAVNE RASPRAVE O PRIJEDLOGU AMANDMANA I NA USTAV BiH**  
**U ORGANIZACIJI USTAVNOPRAVNE KOMISIJE PREDSTAVNIČKOG DOMA**  
**I USTAVNOPRAVNE KOMISIJE DOMA NARODA**  
**PARLAMENTARNE SKUPŠTINE BOSNE I HERCEGOVINE**  
**održane 11.03.2009. godine u Brčkom**

**PREDSJEDAVALAŠĆI**  
**ŠEFIK DŽAFEROVIĆ**

Poštovane dame i gospodo, cjenjeni prijatelji pozdravljam vas u ime Ustavnopravne komisije Predstavničkog doma Parlamentarne skupštine BiH. Mi smo se ovdje okupili da obavimo jedan dio javne rasprave koja se po odlukama ustavnopravnih komisija oba doma Parlamentarne skupštine BiH vodi povodom Amandmana I na Ustav BiH. Koristim priliku da vas sve pozdravim, da vam se zahvalim na odzivu na današnji sastanak na kojem želimo da čujemo vaša mišljenja, prijedloge i sugestije.

Posebno želim da pozdravim gradonačelnika Brčkog, predsjednika Skupštine Brčko Distrikta BiH i njegovu ekselenciju supervizora za Brčko i zamjenika Visokog predstavnika gospodina Rafija Gregorijana. Pozdravljam naravno sve ostale prisutne, neka se drugi ne ljute što ih posebno nisam pomenuo u pozdravu, jer se pozdrav odnosi na sve.

Ja sam Šefik Džaferović, predsjedavajući Ustavnopravne komisije Predstavničkog doma Parlamentarne skupštine BiH. Danas ću u ime komisija voditi ovu javnu raspravu. Ali prije toga želim da dam riječ uvaženom kolegi Ivi Miri Joviću koji je predsjedavajući Ustavnopravne komisije Doma naroda Parlamentarne skupštine BiH i pozivam ga da vam se obrati, da vas pozdravi.

Izvolite gospodine Joviću.

**IVO MIRO JOVIĆ**

Hvala lijepo uvaženi kolega.

Takođe dozvolite da pozdravim gospodina gradonačelnika i nadgledatelja gospodina Gregorijana i vas sviju koji ste danas ovdje nazočni u ovoj dvorani. Moram priznati kada sam dolazio u Brčko nisam se nadao ovakvom odzivu. I ne znam sigurno da postoji raspoloženje čuti danas ovdje što to nova u BiH, u njenom organiziranju i političkom životu BiH, donosi usvajanje ovakvog jednog, ja bih nazvao, dokumentom. Mada je amandman koji je relativno po svom sadržaju i tekstu malen, ali veliki korak za BiH.

Svaka vaša sugestija biće dobro došla, zato bez sustezanja, volimo čuti što je to što vi koji živite poglavito ovdje bi željeli vidjeti sutra, svoje Brčko, a ja bih rekao naše Brčko. U tom smislu još jednom vas pozdravljam i želim svima nama jedan plodonosan rad.

ŠEFIK DŽAFEROVIĆ

Hvala Vam gospodine Joviću.

Uvažene dame i gospodo ovdje za ovim stolom osim gospodina Ive Mire Jovića predsjedavajućeg Ustavnopravne komisije Doma naroda Parlamentarne skupštine BiH i mene predsjedavajućeg iste te komisije u Predstavničkom domu, nalaze se naše uvažene kolege gospodin Martin Raguž on je zamjenik predsjedavajućeg Ustavnopravne komisije Predstavničkog doma. Gospodin Drago Kalabić također zamjenik predsjedavajućeg Ustavnopravne komisije Predstavničkog doma. Zatim gospodin Sulejman Tihić on je zamjenik predsjedavajućeg Ustavnopravne komisije Doma naroda i ovdje su naša dva sekretara gospodin Hasić i gospodin Bajić sa svojim saradnicima. A osim nas koji smo oficijelno ovdje za ovim stolom također oficijelno u ovoj dvorani iz Parlamentarne skupštine BiH nalazi se gospodin Momčilo Novaković, član Ustavnopravne komisije Predstavničkog doma Parlamentarne skupštine BiH. Gospodin Lazar Prodanović također član Ustavnopravne komisije Predstavničkog doma Parlamentarne skupštine BiH. Gospodin Koprivica iz Doma naroda, gospodin Rudo Vidović, ja se izvinjavam, član Ustavnopravne komisije Doma naroda. Gospodin Halid Genjac član Ustavnopravne komisije Predstavničkog doma i gospodin Adem Huskić član Ustavnopravne komisije Predstavničkog doma Parlamentarne skupštine BiH.

Mi smo se dogovorili da svi članovi ustavnopravnih komisija, dakle, svih nas 9 i 6, petnaest, budemo prisutni od pet javnih rasprava koje ćemo organizirati na dvije. Jedna je ova ovdje i druga će biti 17. ako Bog da u Sarajevu, a sutra će se to ću vam pročitati nešto kasnije, ovaj, odvijati javne rasprave po BiH u još nekim gradovima gdje ćemo se mi morati podijeliti. Ali smo se opredjelili da u Brčko dođemo svi zato što se ovaj amandman tiče prije svega vas, vas u Brčkom.

Poštovane dame i gospodo kao što vam je poznato Parlamentarna skupština BiH je na 47. sjednici Predstavničkog doma održanog 04. marta 2009. godine i na 26. sjednici Doma naroda održanoj 05. marta 2009. godine usvojila Prijedlog amandmana I na Ustav BiH u prvom čitanju. Oba doma Parlamentarne skupštine BiH usvojila su zaključke kojim su ovlastili ustavnopravne komisije da zajedno organiziraju javne rasprave o Prijedlogu amandmana I na Ustav BiH. A javna rasprava će trajati i traje od 05.03.2009. do 20.03.2009. godine prema sljedećem rasporedu – Brčko danas 11.03.2009. godine u 11:00 sati u sali Skupštine Brčko Distrikta BiH, Tuzla 12.03.2009. godine u 11:00 sati sala Skupštine Tuzlanskog kantona, Banja Luka 12.03.2009. godine 14:00 sati sala Narodne skupštine RS, Mostar 12.03.2009. godine u 11:00 sati sala Gradskog vijeća grada Mostara, a glavna ili završna, kako god hoćete nazovite je, javna rasprava će biti održana u Sarajevu 17.03.2009. godine u 11:00 sati u Velikoj sali ili dvorani Parlamentarne skupštine BiH. Svim državnim, entitetskim i općinskim organima vlasti i predstavnicima međunarodnih institucija upućen je poziv za učestvovanje u javnim raspravama, a javnim pozivom putem svih radio televizijskih servisa obavješteni su zainteresirani da svoje stavove i mišljenja o Prijedlogu amandmana I na Ustav BiH mogu neposredno iznijeti na javnim raspravama u navedenim gradovima, odnosno dostaviti ih poštom na adresu Parlamentarne skupštine BiH, tj. elektronskom poštom.

Iz Odluke o održavanju Javne rasprave o Prijedlogu amandmana I na Ustav BiH ja ću samo navesti nekoliko detalje. Na javnu raspravu u Brčkom direktno su pozvani pozivima svi

zastupnici u Skupštini Brčko Distrikta BiH, članovi Vlade Brčko Distrikta, supervizor za Brčko Distrikt BiH, predstavnici Vijeća ministara, Pravosudna komisija Brčko Distrikta BiH, Osnovni sud Brčko Distrikta, Apelacioni sud Brčko Distrikta, Javno tužilaštvo Brčko Distrikta, gradonačelnik Brčko Distrikta, predstavnici nevladinih organizacija i mediji. A osim toga upućen je poziv svim zainteresiranim građanima iz BiH i Brčko Distrikta da mogu danas biti prisutni ovoj raspravi. Po istoj šemi mi smo se odlučili i da za ostale gradove pozovemo jedan broj ljudi po pozivu, a istovremeno je poziv za javnu raspravu je upućen svim općinskim vijećima i skupštinama općina u BiH radi, prema vlastitom izboru, sudjelovanja u javnoj raspravi u jednom od navedenih gradova i iznošenja svojih stavova i mišljenja o Prijedlogu amandmana I na Ustav BiH.

Poziv za glavnu javnu raspravu je upućen Ustavnom sudu BiH, Visokom sudskom i tužilačkom vijeću radi sudjelovanja u javnoj raspravi i iznošenja svojih stavova i prijedloga i mišljenja o Prijedlogu amandmana I na Ustav BiH. A javni poziv je emitiran putem javnih elektronskih emitera u BiH.

Poštovane dame i gospodo ja cjenim da je ovo vrijeme od 05. pa do 20. ovog mjeseca, a nadam se i vrijeme nakon kojeg će uslijediti sjednica Predstavničkog doma i Doma naroda Parlamentarne skupštine BiH vrlo značajno i vrlo važno vrijeme. Nakon Dejtona mi se nalazimo u četrnaestoj godini i ovo je prvi amandman na Ustav BiH. Ovo je vrlo važno pitanje, Brčko Distrikt BiH je do sada bio situiran u Aneksu II Dejtonskog mirovnog sporazuma, u tekstu koji govori o arbitraži za područje Brčkog. Brčko danas funkcioniра na osnovu arbitražne, arbitražnih odluka i Statuta i ovo je dakle situacija i prilika kada se putem ovog amandmana, dakle Amandmana I na Ustav BiH Brčko Distrikt BiH situira u Aneks IV, odnosno u Ustav BiH. Zbog toga ja smatram da je ovo vrijeme u kojem vodeći raspravu, da je ovo vrijeme u kojem vodimo raspravu o ovom amandmanu, dakle javnu raspravu zapravo vrlo važno i vrlo značajno vrijeme za BiH.

Zahvaljujem se svima onima koji su u dosadašnjem procesu učestvovali i oblikovali ovaj tekst amandmana. Mi po našem Poslovniku i po našim poslovnicima imamo obavezu da čujemo glas javnosti. Ovo je također po prvi puta u demokratskoj BiH da se vodi javna rasprava o promjeni Ustava BiH. I kako je budemo organizirali ovaj puta po ovom amandmanu, prvom amandmanu, Amandmanu I na Ustav BiH tako će to biti i u budućnosti. Mi želimo da čujemo najširi krug građana, da čujemo njihove prijedloge, mišljenja i sugestije oko ovog amandmana.

Toliko za uvod, a ja ću sada da pročitam tekst Amandmana I na Ustav BiH koji je u prvom čitanju usvojen od strane oba doma Parlamentarne skupštine BiH, a nakon toga ću dati i vama riječ. Amandman glasi:

U Ustavu BiH iza člana VI, 3. dodaje se novi član VI, 4. koji glasi:

„4. Brčko Distrikt BiH,

Brčko Distrikt BiH koji postoji pod suverenitetom BiH i spada pod nadležnosti institucija BiH, onako kako te nadležnosti proizilaze iz ovog Ustava, čija je teritorija u zajedničkoj svojini, (kondominijumu), entiteta je jedinica lokalne samouprave s vlastitim inistitucijama, zakonima i propisima i sa ovlaštenjima i statusom konačno propisanim odlukama Arbitražnog

tribunala za spor oko međuentitetske linije razgraničenja u oblasti Brčkog. Odnos između Brčko Distrikta BiH i institucija BiH i entiteta može se dalje urediti zakonom koji donosi Parlamentarna skupština.

Stav 2. Ustavni sud BiH je nadležan da odlučuje o bilo kom sporu u vezi sa zaštitom utvrđenog statusa i ovlaštenja Brčko Distrikta BiH, koji se može javiti između jednog ili više entiteta i Brčko Distrikta BiH ili između BiH i Brčko Distrikta BiH po ovom Ustavu i odlukama Arbitražnog tribunala. I stav

3. Svaki takav spor također može pokrenuti većina poslanika Skupštine Brčko Distrikta BiH koja uključuje najmanje 1/5 izabranih poslanika iz reda svakog od konstitutivnih naroda.“  
Kraj citata.

Sve ono što danas kažete, a ja vas pozivam da aktivno učestvujete u raspravi, biće zabilježeno i biće analizirano od strane Ustavnopravne komisije, biće sabrano u jedan dokument i biće dostavljeno svim poslanicima koji o ovome treba da donesu konačnu odluku.

Toliko od mene za uvod. Ja sam na početku sjednice, ja sam na početku sjednice pozdravio supervizora za Brčko i zamjenika Visokog predstavnika, njegovu ekselenciju Rafija Gregorijana i budući da je on čovjek koji je vrlo aktivno, prema mojim saznanjima, učestvovao u kreacijama ovih rješenja, naravno sa svakako domaćim političkim faktorima. I pošto je on supervizor za Brčko sa odgovarajućim mandatom prema Dejtonskom sporazumu i prema Arbitražnoj odluci, ja bih ga, ne čekajući da se on sam javi, zamolio da uzme riječ i da se obrati ovom skupu. Ako se slažete gospodine Gregorijan onda imate riječ.

RAFI GREGORIЈAN

Hvala Vam gospodine Džaferoviću.

Dobro jutro dame i gospodo stanovnici Brčkog. Naravno zahvaljujem se gradonačelniku i predsjedniku Skupštine Brčkog i poslanicima Skupštine Distrikta, kao i predstavnice, diplomatama koji rade ovdje u BiH. Takođe bih hteo da primetim da imamo ovdje danas među nama najmanje tri predstavnika bivšeg Predsjedništva BiH. I na moje veliko zadovoljstvo rekao bih da je najveći broj ljudi koji su danas ovdje prisutni i predsjedavaju ovom sjednicom da su to ljudi sa kojima sam pre četiri godine radio na reformi odbrane. To je dokaz da kada se nađe jedno dobro rešenje da se onda na osnovu njega može raditi dalje i mogu se postizati odgovarajući rezultati sve do danas.

Hteo bih da se zahvalim obema komisijama Predstavničkog i Doma naroda za organizovanje ovog današnjeg događaja. Jer je pre svega važno za mene da objasnim zbog čega je potreban ovaj amandman, a nakon toga da objasnim i elemente koji su u istom sadržani i koji proističu iz Aneksa II. Čisto da stavim do znanja koliko je Brčko važno, pre 11 godina prvi put sam se pojavio ovdje u uniformi svoje države, dakle među mirovnim snagama. A danas sam ovdje, stojim pred vama u parnom odelu i sa kravatom i govorim o tome kako ovo da privedemo kraju.

Kao prvo, zbog čega nam je potreban amandman? Odgovor delimično leži u tome kako je na koji način formiran Distrikt. U Dejtonu u Opštem okvirnom Sporazumu za mir Distrikt je uključen u Aneksu IV. Međutim nije postojao dogovor po ovom pitanju šta učiniti u ovom području, taj dogovor nije postojao između entiteta. Zapravo sam Opšti okvirni Sporazum za mir, drugačije zvan Dejtonski sporazum umalo da nije ni došlo do njega upravo zbog ovog pitanja. Ali strane su odabrale da ne nastave sa ratnim dejstvima već umesto toga da prihvate obavezujuću arbitražu koja se navodi u Aneksu II Dejtonskog sporazuma. Tribunalom koji obuhvata, u kome učestvuju i predstavnici iz RS i Federacije BiH predsedava i dan danas, on i danas postoji i predsedava gospodin Roberts Owen. Saslušanja su po ovom pitanju počela 1996. godine, ali ono što je u samom početku već postalo jasno to je da ni jedan od entiteta ne primenjuje Dejtonski sporazum u području Brčkog. Kao rezultat toga naloženo je da se ovdje oformi kancelarija supervizora koja bi imala ulogu da nadgleda implementaciju Dejtonskog sporazuma ovdje. To se pominje u tzv. Prvoj odluci Tribunala. Druga ili tzv. Dopunska odluka koja je bila donete naredne godine, u njoj je takođe utvrđeno da ni jedan od entiteta u ovoj oblasti, u ovom području ne izvršava Dejtonski sporazum. Tada su entiteti bili upozoreni da ukoliko ni jedna od ove dve strane ne bude počela sa primenjivanjem Sporazuma, da će Tribunal preduzeti odgovarajuće radnje. Entiteti se zapravo nisu pridržavali onih uputstava koje je davao Tribunal, tako da je naredne godine 1999. Tribunal doneo konačnu odluku. To je prilično dugačak, veliki dokument, ali je dostupan javnosti. Ali vezano za našu današnju diskusiju njegove važne odlike su sledeće: njome je formiran Distrikt Brčko BiH i stavljen je pod suverenitet države, ali je njegova teritorija u potpunosti dodeljena obama entitetima, ono što se u međunarodnim pravnim krugovima naziva kondominijumom. Međutim pošto ni jedan od entiteta nije implementirao Dejtonski sporazum u ovom, na ovom području, onda je Tribunal doneo odluku, da ni jedan od entiteta nema potpunu vlast u Distriktu. Umesto toga doneta je odluka da Distrikt ima sopstvene organe lokalne samouprave uključujući policiju, sud, sopstvenu vladu i skupštinu. Tako da Distrikt je formiran više od tri godine nakon potpisivanja Dejtonskog sporazuma. I upravo zbog toga on se ne pominje eksplicitno u Ustavu. Iako su uslovi iz Ustava takvi da za njega postoji ustavni osnov.

Problemi na koje smo u međuvremenu naišli ukazuju na to da je ovaj amandman potreban iz nekoliko razloga. Dva su slučaja koja posebno govore u prilog ovome. Kao prvo postojao je spor na relaciji između Brčko Distrikta, oba entiteta i države, a sve u vezi sa Porezom na dodatu vrednost. Nije bilo moguće rešiti ovo pitanje pred Ustavnim sudom, te je zbog toga za, te je zbog toga za rešavanje ovog pitanja bio pozvan Arbitražni tribunal koji, kao što sam malopre pomenu i dalje postoji. U članu 6.3.a) Ustava navedene su ona lica i organi koji omogućavaju obraćanje Distrikta Ustavnom sudu. Međutim tu se navode samo entitetski i državni zvaničnici. A svi oni bili su na suprotnoj strani u odnosu na Brčko kada se radi o sporu koji je nastao u vezi sa raspoređivanjem prihoda od PDV-a. Zbog toga Brčko ne može da se osloni na te organe, odnosno lica koji su definisani u članu 6.3.a) kada se radi o rešavanju sporova u interesu Distrikta.

Drugi slučaj koji je svima ovdje dobro poznat odnosi se na tužbu Privredne banke Sarajevo protiv Pavlović banke. Ono što je tada postalo očigledno, to je da Ustavni sud nije postupao u skladu sa onim što je propisano konačnom odlukom kada se bavio rešavanjem pitanja koja se odnose na Brčko. Iako smo svi mi smatrali, verovali da su oni obavezni da upravo to učine. Ali stav Ustavnog suda prenet mi je od strane sadašnjeg predsednika Ustavnog suda, gdje

je rečeno da oni smatraju da Distrikt nema zakonsko pravo da sam donosi zakone. Čime se demonstrira jedno nepostojanje shvatanja, razumevanja onoga što je propisano odlukama. U nastojanjima da se reši spor vezan za prihode od PDV-a nastupio je Stejt department kao posrednik u rešavanju ovog spora. Neki od vas koji ste danas ovdje prisutni bili ste uključeni u rešavanje tog pitanja. U periodu od nekih 18 meseci do 2 godine razgovarali smo sa Većem ministara o svakom mogućem načinu da se ovo pitanje reši putem zakona. Svako rešenje o kojem smo razgovarali na kraju je ukazivalo na to, da bi postalo delotvorno i primenjivo, da je moralo da podrazumeva amandmane na Ustav. Do vansudske rasprave došlo je u vreme kada sam ja bio imenovan za supervizora u septembru 2006. godine. Kada sam stupio na dužnost u razgovorima sa određenim brojem političkih lidera došlo se do istog zaključka, a o čemu je razgovarano i ranije, a to je da su za ovo pitanje potrebni ustavni amandmani. To je takođe bio stav i predsednika Tribunala koji je u razgovorima sa mnom i sa predstavnicima Stejt departmenta, takođe pomenuo da je potrebno da se usvoje određen amandmani na Ustav radi rešavanja ovog pitanja. Tako da smo razgovore na tu temu počeli početkom 2007. godine. Nažalost pregovori su trajali još dve godine kako bi smo stigli do evo ovog trenutka sad. Ali kako bi smo imali dobro rešenje za koje bi postojala široka podrška sav taj trud bio je vredan.

Šta dakle donosi ovaj amandman ukoliko bude donet? Kao prvo za mene je najvažnije da on omogućava da se upotpunosti izvrši konačna odluka. Time se završava proces koji je započet Aneksom II Dejtonskog sporazuma kako bi se ostvarilo ono što je poropisano Aneksom IV Dejtona. Time se stvaraju uslovi da izvestim Arbitražni tribunal da je konačna odluka implementirana i da institucije Distrikta funkcionišu po svemu sudeći efikasno i po svemu sudeći trajno.

Dozvolite mi sada da kažem nešto o samoj sadržini amandmana pred Parlamentom. A gospodin Džaferović već vam je pročitao sam tekst.

Prvi stav, tekst u ovom stavu u potpunosti je preuzet iz same konačne odluke. Pominjanje kondominijuma prepisano je iz same konačne odluke. Ali tu ima i još nešto. Time što se uzima ova definicija Distrikta koja je propisana svim odlukama Tribunala, takva definicija uvrštava se u Ustav BiH. Ono što je najvažnije to je kada se kaže – Da su ovlašćenja Brčko Distrikta, kao konačna, propisana konačnim odlukama. Ono što to znači to je da niko ne može da promeni ovlašćenja i status Distrikta, čak ni Ustavni sud.

Zatim se dalje kaže – Da Parlamentarna skupština može putem odgovarajućeg zakona, a dodatno na onu definiciju Distrikta koja već postoji, regulisati odnose između Distrikta i države, odnosno entiteta. Samo Parlament BiH može to da učini, ne i entiteti. Ali Parlament nema pravo da promeni ovlašćenja i status Distrikta koji su utvrđeni konačnim odlukama. Ali kako BiH ide ka EU nesumnjivo da će biti onih oblasti koje će zahtevati da budu regulisani odnosi između Distrikta i države, odnosno entiteta, a to se može učiniti putem zakona.

Stoga se u prvom stavu definiše Distrikt, u drugom stavu se kaže – Da Ustavni sud ima nadležnost da rešava pitanja, sporove koji se mogu pojaviti između Distrikta i države. Ali kako bi se prevazišli malopre pominjani problemi u vezi sa Ustavnim sudom, sada se ovdje propisuje da Ustavni sud mora pitanja rešavati u skladu sa konačnim odlukama.

Druga stvar koja je važna u pogledu stava 2. to je da se on odnosi na sporove koji se mogu pojaviti između, do kojih može doći između Distrikta kao Distrikta i države, odnosno entiteta kao odgovarajućih organa. Što je opet važno da bi se shvatila važnost trećeg stava. Nije predviđeno da ovakva pitanja koja bi bila upućena Ustavnom sudu mogu imati veze sa nacionalnim interesima. Kako je utvrđeno konačnim odlukama Brčko Distrikt je jedinica lokalne samouprave. Praksa rada skupštine od njenog osnivanja bila je takva da radi na multietničkim osnovama. Jedini put kada to nije bio slučaj je kad je jedna grupa ljudi napustila skupštinu. Ljudi ovdje će se prisjetiti da nakon dugotrajnih razgovora prošle godine došlo je ovdje do usvajanja određenih mehanizama koji sprečavaju preglasavanje po nacionalnoj osnovi. Osim ukoliko, dakle, to je moguće samo ukoliko ne dođe dovoljan broj poslanika.

Dakle treći stav, u njemu se kaže – Da svaki takav spor takođe može pokrenuti većina poslanika Skupštine Brčko Distrikta BiH koja uključuje najmanje 1/5 izabranih poslanika iz reda svakog od konstitutivnih naroda. Ne shvatam zbog čega ljudi vide ovakvu odredbu kao neku vrstu problema. Jer ona odražava jednu doktrinu i način rada Skupštine Distrikta od samog osnivanja iste.

Dozvolite mi da vam dam dva primera u kojima se to demonstrira. Kada se radi o sporu sa državom i entitetima vezano za Porez na dodatu vrednost Skupština je jednoglasno podržala svoj stav u ovom sporu. Skupština i Vlada branile su interese Distrikte posmatrano u celini, a ne određenih grupa u okviru Distrikta. Još jedan takav primer odnosi se na jednoglasno usvajanje od strane Skupštine rezolucije koja se odnosi na ovaj amandman. Tako da ja pored ova dva primera ne mogu da se setim nečega upečatljivijeg u smislu podrške za ovakav amandman i ovu odredbu. U redu hajde onda da hipotetički pretpostavimo da se može pojaviti neka grupa koja ne bi bila saglasna sa ostalima kada se radi o obraćanju Ustavnom sudu po pitanju ovakvog ili sličnog spora. Svakako da ćete sada na osnovu toga shvatiti razliku u tekstu između, svaki takav spor takođe može pokrenuti većina poslanika u odnosu na pređašnji tekst koji je glasio – Da svaki takav spor može samo pokrenuti većina poslanika. Postoje tri načina u pogledu ovakvog spora da on dođe pred sud. Najpre državni zvaničnici ili oni u entitetima mogu pokrenuti spor, to je propisano članom 6.3.a). Ali već sam govorio o ograničenjima u tom pogledu jer ti sporovi su u okviru entiteta, odnosno države.

Zatim je tu član 6.3.b) kojim se propisuje – Da je Ustavni sud krajnja apelaciona instanca u BiH. A spomenuo sam i neka ograničenja u tom smislu kada se radi o ovom slučaju Pavlović banke.

I na kraju član 6.3.c) gde se kaže – Da sam sud može pokrenuti spor pred sudom, Ustavnim sudom. A to već postoji kao opcija u Ustavu koja je trenutno konfigurisana.

Ono što će se ovim amandmanom postići to je da će na osnovu jednog ubrzanog postupka biti omogućeno skupštini da se obrati Ustavnom sudu. I ja lično ne vidim nikakve okolnosti pod kojima u Skupštini Distrikta ne bi bio pređen taj prag u pogledu broja glasova, da se da podrška za upućivanje ovakvog jednog spora na sud. Tako da što se tiče svakog aspekta ovoga ja kao i vlada čiji sam predstavnik, mi vidimo samo pozitivne, dobre strane ovog. Čak i kada se radi o delu teksta u vezi sa kojim neki ljudi onako podignu obrvu, a to je deo teksta koji, u kome se kaže – jedan ili više entiteta. Ustav je sasvim jasan u pogledu strukture zemlje, dakle

ovaj amandman ima veze sa Ustavom u pogledu Ustavnog suda, a ne u vezi sa uređenjem same države. I na kraju sasvim je jasno o čemu ovdje govorimo kada pomenemo prvi stav u kome je definisano da Brčko Distrikt postoji na osnovu arbitražnih odluka, a do kojih je zapravo došlo jer je postojao sukob i spor između entiteta. Tako da što se mene tiče u pogledu samog teksta formulacije ne postoje nikakve prepreke ni za mene, a ni za vladu koja me imenovala u službu OHR-a.

Vaše ekelencije, dame i gospodo ja se nadam da je ova prezentacija za vas bila od koristi u pogledu razumevanja ovog amandmana. Ponovo se zahvaljujem organizatorima ovog skupa, izražavam posebnu zahvalnost zbog toga što smo sa ovim počeli upravo ovdje u Brčkom za koji ovo znači više nego bilo šta drugo.

Hvala vam.

ŠEFIK DŽAFEROVIĆ

Hvala Vam gospodine Gregorijan, na opservaciji koju ste iznijeli koja u sebi sadrži nekoliko vrlo važnih stvari počev od normativnog pa i ustavnopravnog razvoja Brčko Distrikta BiH od Dejtona pa na ovamo, na objašnjenju pojedinih rješenja sadržanih u amandmanu koja su potkovana i nekim praktičnim događajima koji su se desili u životu Brčko Distrikta BiH od Dejtona pa na ovamo. I koja su između ostalog uticala na konačno oblikovanje i nekih rješenja u ovom amandmanu kao i na pojašnjenjima i odgovorima na neke primjedbe ili navode povodom ovog amandmana koji su se već u bosanskohercegovačkoj javnosti mogli čuti. I ja mislim da će to svakako jako dobro doći i jako pomoći svima koji učestvuju u ovoj raspravi da mogu da imaju jedan objektivn odnos prema ovom tekstu i da nam naravno kažu šta o tome misle. Hvala vam još jedanputa.

Ja neću prozivati više nikoga, ali ovdje su i gradonačelnik i predsjednik Skupštine, ukoliko žele da se obrate, ovaj, onda je to do njih. A sve vas ostale molim da na ove prijavne obrasce iskažete upisivanjem vašeg imena želju da želite nešto da kažete, to će doći ovdje za ovaj sto. Ukoliko gradonačelnik Brčkog želi da govori i predsjednik Skupštine, onda je redosljed ovakav: gradonačelnik(?) Skupštine, nakon toga predsjednik Skupštine, a onda prvi prijavljeni doktor Anto Domić Skupština Brčko Distrikta BiH. To je jedina prijava koja je do sada do mene stigla i ovo bi bio redosljed.

Izvolite.

GRADONAČELNIK  
BRČKO DISTRIKTA

Dame i gospodo, građani Brčko Distrikta, gospodine supervizore.

Zahvaljujem se organizatorima ove javne rasprave i evo koristim priliku da vas sve ovdje pozdravim i da vas obavjestim o činjenicama koje su jedino nedostajale, jer je u svom obraćanju gospodin supervizor praktično rekao sve ono što se treba reći u prilog ovoj aktivnosti koju danas imamo. Jedino što je izostalo jeste činjenica da smo mi i prije izbora na sve ove funkcije koje obnašamo u Brčko Distriktu i prije formiranja vlasti i prije bilo čega što smo uopšte razmišljali da će se desiti u ovom periodu od izbora do danas, potpisali jednu izjavu i usvojili jednu rezoluciju u Skupštini Brčko Distrikta koja je usvojena jednoglasno, na taj način stavili

smo do znanja i javnosti BiH i građanima Brčko Distrikta da bez obzira na političku pripadnost imamo takav stav i takvu želju da se usvajanjem ovog amandmana konačno rješi status Brčko Distrikta. Mislim da je ta činjenica sama po sebi dovoljna da u ovom momentu jedino što mogu vama, organizatorima ovog skupa da poručim jeste želja i molba da vi kao organizatori i predstavnici svih nivoa vlasti BiH u ovih par dana u javnoj raspravi steknete utisak o neophodnosti usvajanja ovog amandmana i da apelujem na vas da u redovnoj parlamentarnoj proceduri u oba doma Skupštine BiH usvojite ovaj amandman.

Od mene toliko hvala.

ŠEFIK DŽAFEROVIĆ

Hvala vam gradonačelnice.

Svakako je da ćemo mi voditi računa o svemu onome što se kaže u javnoj raspravi, ovo nije šalni posao što bi se u narodu reklo, ovo je promjena Ustava i mi smo zato došli da na licu mjesta čujemo sve što treba da čujemo.

Gospodine predsjedniče Skupštine izvolite.

PREDSJEDNIK SKUPŠTINE  
BRČKO DISTRIKTA

Ma evo prije svega želim vam zahvaliti, želim pozdraviti građane Brčko Distrikta, vas organizatore svakako, supervizora i predstavnike vlasti Brčkog.

Ovo što želim reći jeste činjenica da sam ja bio jedan od, hajd da kažem, sretnika koji je na svojoj koži doživio to šta znači nemati mogućnost obratiti se Ustavnom sudu BiH. Ja sam kao gradonačelnik kod utvrđivanja koeficijenata PDV-a bio u poziciji gdje se jasno vidjelo da nam se sredstva uzimaju, nikakvih zaštitnih mehanizama za to nismo imali i jedino što mi je preostalo imao sam razumjevanje tadašnjeg supervizora, a poslije toga i sadašnjeg, zajedno sa Visokim predstavnikom da se to zaustavi. Inače Brčko bi došlo već tada u jednu ozbiljnu poziciju da fiskalnu stabilnost nema potpuno održivu. S koeficijentima koji su, odlukama koje su tada donošene sa 2,8, 2,7 mimo svih kriterija zaista smo bili dovedeni u jednu tešku situaciju. Mislim da nema potrebe da institucije države, da entiteti ovako nešto u narednom periodu rade, pogotovo ne bi bilo potrebe ukoliko obezbjedimo amandmanom pristup Ustavnom sudu BiH.

Zaista da Visoki predstavnik uz inicijativu gospodina Gregorijana nije donio odluku za četiri ove, zapravo pet godina, pitanje je gdje bi mi sada bili kod fiskalne stabilnosti. Dakle i zato apelujem da se ovaj amandman usvoji. Mi, dilema u Brčko Distriktu oko toga nemamo. Ima dilema oko nekoliko odredbi. Ali ono što bih želio reći, ja se bojim da otvaranje paketa, da tako kažem, mjenjanjem sadržaja ovog amandmana ne dođemo u poziciju da nema političke volje dovoljne da se amandman usvoji. To se vama obraćam iz razloga što znam da imaju već razni ocjene, možda bi i ja mogao o nečemu oko toga govoriti, ali mislim da sadržaj ovog amandmana daje dovoljno osnova da se zaštiti pozicija Brčko Distrikta i da se Brčko pozicionira shodno konačnom arbitražnom rješenju. Da li ima boljih formulacija ili ne to je sad stvar ocjene, ali formulacije koje ne bi imale konsenzus bojim se da bi nas dovele u jednu vrlo tešku situaciju.

Inače zahvaljujem vam na ovoj organizaciji, zahvaljujem svim institucijama države, pa i, a da kažem i političkim strankama iz oba entiteta, dakle iz države što su Brčko evo stavili u poziciju da prvi amandman na ovaj Ustav upravo bude Brčko Distrikt BiH. Mislim da ste i tu pokazali da dajete značaj i Distriktu za sve ono što je radio. Međunarodna zajednica takođe sa snažnom podrškom ovom svemu i ne bi smijeli izgubiti šansu da ovaj amandman ne bude usvojen u proceduri nakon ove javne rasprave. Jedino, ponavljam, čega se bojim jeste ako se otvori priča o izmjenama teksta, da se tu ne podijele političke stranke, poslanici i dođemo do onog što u BiH nažalost bude praksa, onda nemamo dovoljan broj glasova. Ja između izbora eventualnih promjena i ovog teksta sam uvijek za ovaj tekst, ponavljam, a jedina promjena ako nemaju puni konsenzus oko sadržaja to, o tome se može razgovarati, ali pojedinačni zahtjevi za promjene mogu nas daleko odvesti.

Toliko i hvala vam.

ŠEFIK DŽAFEROVIĆ

Hvala Vam predsjedniče Skupštine.

Sad riječ ima doktor Anto Domić, a sljedeći prijavljeni je gospodin Sejfidin Zahirović Klub Stranke za BiH, Skupštine Brčko Distrikta, neka se pripremi.

Gospodine Domiću izvolite.

ANTO DOMIĆ

Dobar dan svima.

Želim se zahvaliti uvaženim zastupnicima oba doma Parlamentarne skupštine BiH što su evo danas došli u Brčko Distrikt i ovo je jedan od posebnih dana u Brčko Distriktu kad najviši zvaničnici vlasti sa razine BiH nas posjećaju i odnosno dolaze nam u posjetu i to znači da je Brčko Distrikt postalo jedan, odnosno ušlo u sastav BiH na onaj pravi način, da ga svi doživljavamo kao dio BiH, a ne kao što je nekada prije šest, sedam godina bila jedna krilatica, država u državi. Brčko Distrikt BiH nikada nije htio biti država u državi, niti je kada htio biti treći entitet u BiH, uvijek smo htjeli biti ono što nam je napisano u konačnoj arbitražnoj odluci i što evo sada, hvala Bogu, smo došli u situaciju da možemo raspravljati o amandmanu na Ustav BiH u kome se precizira što je to Brčko Distrikt i na koji način možemo funkcionirati kroz naše ustavnopravno uređenje bez posebnog autoriteta Ureda OHR-a. Jer na kraju ćemo uvijek doći u situaciju da moramo uzeti sudbinu u svoje ruke, odnosno da svoju budućnost moramo sami kreirati. Koliko god mi volili ili bili zahvalni našem supervizoru i drugim supervizorima koji su bili ovdje u Brčko Distriktu na teškoj funkciji i vrlo često u teškim iskušenjima ipak moramo dočekati dan kada ćemo mi sami moći kreirati svoju sudbinu. A tu sudbinu možemo kreirati samo ako znamo jasno svoju poziciju u ustroju BiH i bez ovih ustavnih promjena teško ćemo moći opstati ili teško ćemo moći funkcionirati u budućnosti.

Ja bih se isto tako zahvalio kreatorima ovoga amandmana i vidim da je sa velikom pozornošću se pristupilo kreiranju teksta ovog amandmana i čini mi se da je svaka riječ ovdje izbrušena i izvagana kako bi se mogle eventualne nejasnoće pokriti, a s druge strane i da se može na adekvatan način i obrazložiti razlozi i potreba donošenja ovoga amandmana. Svakako je supervizor za Brčko Distrikt doktor Rafi Gregorijan u svom uvodu kao najkompetentnija osoba

dao jedan povjesni kronološki slijed nastanka Brčko Distrikta i potrebe da se u konačnici u Ustavu BiH ugradi i pozicija Brčko Distrikta ovakva kakva sada postoji.

Želim još reći da je veliki napredak u relaciji ili na relaciji između Brčko Distrikta i država BiH učinjen u zadnjih pet godina kroz razne angažmane. Taj napredak je išao korak po korak prvo ustrojem ureda pri Vijeću ministara BiH, Ureda Brčko Distrikta i evo sada smo u situaciji da imamo puno razumjevanje i političkih stranaka i vas izabраниh zastupnika u Parlamentu BiH, koji štítite i naše interese, kad ih već štítite ajmo da ih štítite na ustavom zagarantirani, propisani način. I ja vam se zahvaljujem na dosadašnjem angažmanu, zahvaljujem se svim zastupnicima koji su digli u prvom čítanju i poduprli ovaj Prijedlog amandmana. I vjerujem da ćemo i u konačnici nakon provedenih javnih rasprava imati amandman na Ustav BiH gdje će Brčko Distrikt zasjati u pravom svom sjaju. Jer vjerujem da ono što je dobro svi žele, a mi se trudimo da budemo dobar primjer u BiH i da zastupnici sutra kada budu raspravljali o tom događaju izglasavanja Amandmana I na Ustav BiH, da to s ponosom spominju i da s ponosom ističu. Jer stanovnici Brčko Distrikta sva tri konstitutivna naroda i ostali koji žive ovdje će sigurno, hoće i u budućnosti će sigurno kreirati pravne norme koje će garantirati jedan skladan suživot svih koji ovdje žive. Iako je, o idealizmu ne treba govoriti tomu se može samo težiti i da ima puno problema to je točno, ali praksa suživota i zajedničkog funkcioniranja ili obnašanje vlasti u Brčko Distriktu sva tri konstitutivna naroda u prošlosti je pokazala da ipak postoji jedna velika doza razumjevanja i tolerancije među svima nama i ovaj amandman će samo biti kruna tog našeg dosadašnjeg načina rada i ponašanja.

Evo toliko, hvala vam lijepa na mogućnosti da govorim ovdje pred vama istaknutim zastupnicima BiH.

Hvala lijepa.

ŠEFIK DŽAFEROVIĆ

Hvala vam gospodine Domiću na ovim riječima, na diskusiji.

Riječ ima gospodin Sejfudin Zahirović i ja za sada ne mogu najaviti sljedećeg, jer nemam više prijavljenih. Ako ima ja željno očekujem vaše prijave.

SEJFUDIN ZAHIROVIĆ

Dame i gospodo, kolegice i kolege, ja bih vas u ime Kluba poslanika Stranke za BiH pozdravio. Drago mi je da danas diskutujemo o ovoj trenutno najvažnijoj temi u BiH, a naravno i u Brčko Distriktu.

Mi u Klubu poslanika SBiH smo pažljivo isčitavali ove ustavne amandmane i dobro smo ih razumjeli, dobro smo shvatili i učinili smo napor da naša, naša shvatanja, naša razumjevanja i potrebe da se Brčko Distrikt pozicionira u Ustavu BiH prenesemo i poslanicima SBiH u Parlamentarnoj skupštini BiH, što je naravno rezultiralo i podrškom njihovom u prvom čítanju ovih amandmana. Naravno naši su stavovi da Brčko Distrikt mora biti pozicioniran u Ustavu upravo da bi se u konačnici mogla implementirati do kraja konačna arbitražna odluka i u suštini završio proces arbitraže. Međutim mi takođe mislimo da sa ovim ... vezano za sam Ustav trebalo bi zakonskim propisima ... one odnose koji su od .... vezane za Distrikt Brčko, a koje se

prepliću sa određenim interesima entiteta, odnosno države BiH. Iz tih razloga mi, zastupnici SBiH u Skupštini Brčko Distrikta smatramo da građani Brčko Distrikta .... da Parlamentarna skupština .... nekakvog diranja u bilo koje segmente ... ovog amandmana ... okvir cjeline ... BiH pa i poslanika SBiH ... ovaj amandman.

Hvala lijepo.

ŠEFIK DŽAFEROVIĆ

Hvala vam gospodine Zahiroviću na ovoj diskusiji .... na podršci jel i ako se ne ljutite ovaj, ... da kažem ... možda ste trebali sporije da govorite jer kolega .... sve da zapiše ovaj, ali smo, ... da se ne ljuti ni gospodin Huskić, da se ne ljuti, ovaj, ja se izvinjavam što sam ... dozvolio ovu ... Mislím da stvari ... izvinjavam se ...

SULEJMAN TIHIĆ

.... Poslanici sve vas pozdravljam i drago mi je da sam danas ovdje u Brčkom povodom ovakve jedne rasprave i ovakvog jednoga događaja. Drago mi je da sam evo zajedno sa drugima doprinio rješavanju ovoga problema i posebno mi je drago da postoji jedan široki konsenzus po ovome pitanju, malte ne svih političkih stranaka u BiH. Nadam se da će ovo pitanje, da će još više ujediniti i dati nam snage, razuma, hrabrosti da radimo dalje na izmjenama i dopunama Ustava, da će ovo biti jedan dobar primjer kako se može postići dogovor, kako se mogu postići kompromisi. Jer mi u BiH možemo ići samo naprijed ako se ne samo slušamo, nego ako se razumijemo, poštujemo i uvažavamo. Ja vjerujem da smo mi danas mogli ovdje imati ne samo jedan amandman, mogli smo naredati deset amandmana oko kojih postoji konsenzus. Mislím da ovdje evo svi prisutni će se složiti Amandman o dvojnóm državljanstvu, o izboru ne znam ti članova Predsjedništva, Doma naroda uklanjanje onih diskriminacija i td. Žao mi je što to nismo i ovom prilikom uradili, znate. Žao mi je što ne postoji ta jedna atmosfera ovaj, da uradimo danas ono što možemo danas uraditi o čemu postoji dogovor, o čemu postoji konsenzus, znate ovaj, a ono što ne može da ostavimo za kasnije, pa za šest mjeseci, za godinu i td. Jer čitao sam ovdje i zašto sam se upće javio, ove razne reakcije, ovaj, što su došle na našu adresu, građana znate i to je uglavnom iz inozemstva. I uglavnom je, evo gospodin Jović je čitao, 90% ne, ako ne bude sve nemojte ni ovo. Takva jedna reakcija, takva jedna atmosfera koja mene ovaj zabrinjava, znate ovaj, to nije dobro da se na takav način ovaj, radi. Mi u BiH treba da se, da rješavamo probleme uz dogovore i kompromise i normalno uz pomoć i Međunarodne zajednice kao što smo ovdje imali i pomoć i supervizora i Američke ambasade, ali mi moramo prvi da uradimo, mi moramo da uradimo glavninu posla, pa da nam onda tek oni pomognu.

Ali da se vratim na ovaj amandman. Uvijek se može svakom rješenju naći nekakvih primjedbi, ja mislim da je ovo odličan amandman i da ga treba podržati u ovakvom tekstu kako je napisan. A brojna neka druga pitanja odnosa između Distrikt Brčko i BiH, Distrikta Brčko i entiteta mogu se riješiti zakonom, mogu se riješiti zakonom kojim će biti, koji će biti ovaj, u interesu i Distrikta i entiteta i države BiH. Ja mislim da Distrikt Brčko nije dovoljno zastupljen u institucijama BiH, da to mora biti riješeno zakonom. Ja mislim da bi Distrikt Brčko trebao biti posebna izborna jedinica, između ostalog za državni Parlament i td. Ima raznih ovaj, načina i ovaj potreba da se pitanje Distrikta Brčko još preciznije rješi i zato smo mi rekli da se ostala pitanja mogu ovaj, riješiti zakonom i svi oni koji su nezadovoljni možda sadržajem amandmana,

da je trebalo još nešto ugraditi, da je trebalo još nešto precizirati ovaj, imamo priliku ovaj da to kroz eventualno zakon koji će, koji se može donijeti, kojim će se riješiti ta pitanja još preciznije, još ovaj bolje rješi.

Hvala lijepa.

ŠEFIK DŽAFEROVIĆ

Hvala Vam gospodine Tihiću.

Poštovane dame i gospodo ja nemam više prijava, ali od vas jel, ali evo još jedan kolega od nas želi vama da se obrati, pa mu ja dajem riječ gospodin Marnit Raguž.

Izvolite gospodine Raguž.

MARTIN RAGUŽ

Zahvaljujem se gospodine predsjedatelju.

Dame i gospodo, poštovani sudionici ove javne rasprave, uvaženi zvaničnici Brčko Distrikta, gospodine supervizore. Evo dok očekujemo prijave želim se kratko uključiti u raspravu iz dva razloga.

Prvi je na neki način elaboriran u uvod od strane supervizora u činjenici da je Brčko bilo otvoreno pitanje koje u trenutcima kad je Dejton trebao biti potpisan moglo dovesti u pitanje čitav, ukupni Mirovni sporazum. A danas imamo činjenicu da smo na pragu da rješavanjem Brčko u sklopu Ustava BiH, institucija BiH o toku otvorenog pitanja napravimo najuspješniju priču. I to je poruka i izazov za sve nas da kažemo kako od najtežeg i nasloženijeg pitanja možemo doći do konsenzusa, evo vidimo ovdje svih relevantnih političkih činbenika u Distriktu Brčko i to sve za 14 godina. Ja svima onima koji su dali doprinos da dođe do toga iskreno čestitam, ja se nadam da ćemo mi u Parlamentu BiH smoći snage da ovu priču uspješno završimo.

Drugi razlog zbog kojeg sam se javio, jesu otvorena pitanja u javnosti, ne samo javnosti, to je i unutar međunarodnih krugova znanosti, civilnog sektora, pa i nas u Parlamentu, kako i na koji način voditi ustavne promjene u BiH. A evo o tome je nešto govorio i uvaženi zastupnik gospodin Tihić. I podsjetiću vas, ja sam predsjedavao Parlamentom, odnosno Zastupničkim domom Parlamenta BiH kad je na dnevnom redu bio Travanjki paket amandmana na Ustav BiH. I zašto je ta priča važna i zašto je tu priču važno spomenuti? Vidim da smo svi skupa naučili lekcije od prije dvije godine i nešto i to pokazuje i ova javna rasprava koju Parlament i ustavna povjerenstva organiziraju tijekom i u čitavoj BiH i to je znak da želimo čuti ljude, a ne samo po sustavu uzmi ili ostavi doći u Parlament i uzmite ili ostavite ovakva rješenja. Ovdje je ključ postignuti konsenzus i taj konsenzus treba biti moto kako dalje sa ustavnim promjenama. I činjenica je dakle da ova zemlja svoju evropsku perspektivu koju ona apsolutno zaslužuje i koju ona u svom potencijalu ima, može ostvariti samo ako svi relevantni činbenici i predstavnici tri konstitutivna naroda, naravno zajedno sa svim građanima u skladu sa svim evropskim konvencijama i poveljama, ali ovaj konsenzus, politička volja je bio preduvjet, tad je on na neki način bio u drugom planu i pokazalo se da bez tog konsenzusa uspjeh nije moguć. I evo vjerujem da smo danas ovdje u stanju poslati pozitivnu poruku da kao ovaj teški izazov

rješavanjem Brčkog možemo riješiti i otvorena pitanja usklađenost Ustava, ali i funkcionaliziranja ove države i potpune ravnopravnosti njena tri naroda i svih građana u BiH. Ja sam uvjeren da danas krećemo tim putem.

Evo hvala lijepo.

ŠEFIK DŽAFEROVIĆ

Hvala Vam uvaženi kolega Raguž.

Poštovane dame i gospodo ja nemam zaista više prijavljenih i ja ću na kraju reći sljedeće. Dakle o amandmanu neću govoriti o tome ću govoriti na sjednici Predstavničkog doma Parlamentarne skupštine BiH najmanje dva puta, jedanput kao predsjedavajući komisije, a drugi puta kao poslanik. Ali da ne bih ostavljao nikakvu dilemu, a ja ću vam kazati samo u jednoj rečenici sljedeće. Pročitao sam dakle ovaj amandman istumačio ga na sve moguće načine kako se tumači pravna norma, jel. I moj je zaključak ovako, dakle, ko želi i ko hoće da dobro, da bude dobronamjerman i da dobronamjerno tumači ova tri stava amandmana, onda će zaključiti da je ovo jedan dobar amandman. I o tome ništa više danas neću govoriti, kažem govoriću na sjednici Parlamenta. Javna rasprava se zaključenjem ovog sastanka za vas iz Brčkog i za sve građane BiH ne završava. Završava se ovaj današnji sastanak, ali javna rasprava traje do 20. i ja vas pozivam kao što su pozvani i svi građani, drugi građani, ostali građani BiH da ako slučajno opet imate neku primjedbu ili neku sugestiju da nam je dostavite ili na e-mail ili poštom, adrese su vam poznate, dakle na Parlament BiH. Mi sutra, ako Bog da, idemo u Banja Luku, u Tuzlu i u Mostar da i u tim gradovima čujemo šta ima da čujemo, a 17. ćemo obaviti ovu, hajde da kažemo, neku glavnu ili centralnu ili završnu evo da, javnu raspravu u Velikoj dvorani Parlamentarne skupštine BiH. Svi koji ste zainteresirani ste pozvani i dobro došli na tu javnu raspravu. Mi ćemo sjednicu Ustavnopravne komisije imati 23. i Ustavnopravna komisija će 23. donijeti odluku o amandmanu u drugom čitanju. Ja očekujem da će i uvjeren sam vaš glas, dakle, vas koji žive u ovom gradu i kojih se ovo najviše tiče, a kojeg smo danas čuli ovdje za ovom govornicom, biti podržan i od ustavnopravnih komisija i od oba doma Parlamentarne skupštine BiH.

I na kraju da ne zaboravim, hvala vam na gostoprimstvu, hvala vam na dočeku, hvala vam na organizaciji ove današnje javne rasprave. Ja u ime svih svojih kolega mogu da izrazim zadovoljstvo ovom organizacijom i evo mi ćemo se sjećati svakako ovog sastanka. Ovaj sastanak je završen, a javna rasprava traje do 20.

Hvala vam živi i zdravi bili.

IVO MIRO JOVIĆ

I ja samo želim se pridružiti svim nazočnim, zahvaliti za ovako kvalitetno sudjelovanje u ovoj raspravi i ne čini to i ne umanjuje, neka ste ustali, uradili smo kvalitetno posao.

ŠEFIK DŽAFEROVIĆ

Ja se izvinjavam gospodinu Joviću, eto i ja sam jednu grešku danas napravio, ovo je velika greška, ali evo on se uspio obratiti, trebao sam mu dati riječ. Izvinite molim Vas.